

lere oculum, proptosin vocant, cum ovi albo, quod est tenue. sed praecipue facit, cum quasi sanguine suffusi sunt oculi et ob id nullum nisi lenissimum collyrium patiuntur. recipit autem haec: croci X p. IIII, cadmia X p. IIII, stibis X p. IIII, opii X p. II, commis X p. II, amyli recentis et dulcissimi X p. IIII. eodem ordine, quo scripta sunt, in mortario debent teri ex aqua pluviali; amyllum autem, cum iam fingendum erit collyrium, adicietur. interdum et hoc superinungantur qui prius Athenippio curati sunt. his fere collyriis lenibus omnia, quae cum tumore et dolore fiunt circa oculos, remediamus.

10 Collyria acria

XXVIII. Acrioribus autem his: ad cicatrices extenuandas et palpebras asperas, quod, quia ex quattuor rebus ut quadriga equis constat et celeres effectus habet, harma dicitur; recipit autem haec: aeris usti X p. IIII, thuris arboris corticis X p. IIII, ammoniaci guttae X p. IIII, commis X p. IIII; teruntur ex aqua pluviali.

XXIX. Hoc etiam superunctum ad puerorum epiphoras et qui non sufferunt inunctionem facit, ut huiusmodi medicamenta, quae perichrista vocant: croci Siculi pondo uncia, commis pondo uncia; haec aqua teruntur, fiunt collyria.

20 XXX. Est et hoc medicamentum satis efficax, quo ita oportet palpebras perungere, ne quid intra oculum fluat. recipit autem haec: croci Siculi X p. III, magmae croci X p. XII, thuris X p. III, aluminis rotundi X p. VI, opii X p. I, myrrhae X p. II, commis X p. III. vino Falerno teruntur; cum levia facta sunt et crassitudinem habent mellis spissi, adicitur passus Cretici pondo sextans; reponitur pyxide stagnea; si passum adiectum non erit, collyrium <non> erit.